

fit numerus 3 accurate , vel inveniantur termini duo contigui , inter quos numerus 3 contineatur proxime . His positis , inter 0 & 1 , inferuntur tot medii arithmeticæ proportionales quot medii geometrici inferuntur inter 1 & 10 . Quo facto , sumetur pro logarithmo numeri 3 , terminus progressionis arithmeticæ respondens termino jam invento in progressione geometrica . Hoc artificio & patientissimo multorum annorum labore supputatæ sunt logarithmorum tabulæ .

Commodissimæ sane sunt tabulæ illæ , et enim cum demonstratum sit productum ex duobus numeris logarithmorum summæ respondere , eorum vero differentiæ respondere numerorum quotum , per solam additionem & subtractionem compendiose absolvi possunt multiplicatio & divisio . Sumantur datorum numerorum logarithmi simulque addantur , numerus summæ respondens in logarithmorum tabulis erit logarithmus producti ; contra autem logarithmorum differentia erit logarithmus quoti , ac proinde inveniuntur numeri quæsiti . Simili ratione patet numerum quemlibet ad datam potestatem evehi , si toties sumatur numeri dati logarithmus , quoties per se ipsum numerus multiplicandus proponitur , hoc est logarithmus per exponentem potestatis multiplicari debet , & productum erit quæsiti numeri logarithmus ; contra autem si numeri dati logarithmus per exponentem radicis dividatur , quotus erit quæsitus radicis logarithmus .